



Mnoštvo Allahovih blagodati i zahvala Njemu na obilnoj kiši (Meka)

Hatib: dr. Usama ibn Abdullah Hajjat

13. džumadel-uhra 1444. po Hidžri / 6. januar 2023.

Hvala Allahu, Dobročinitelju, Blagom, Milostivom. Zahvaljujem Mu na mnogobrojnim blagodatima i sveopćem dobočinstvu. Svjedočim da nema boga osim Allaha, jedinog, Koji nema druga: "On je Prvi i Posljednji, i Vidljivi i Nevidljivi; i On zna sve!" (El-Hadid, 3), i svjedočim da je naš prvak i vjerovjesnik Muhammed, sallallahu alejhi ve sellem, Allahov rob i poslanik, predvodnik zahvalnih i uzor bogobožasnih, istinoljubivi, iskreni, nosilac najviših moralnih vrlina. Allahu moj, smiluj se, blagoslovi i spasi Svoga roba i poslanika Muhammeda, sallallahu alejhi ve sellem, njegovu porodicu, ashabe, tabiine i sve one koji ih slijede u dobročinstvu do Sudnjeg dana. Bojte se Allaha, o ljudi: "I bojte se Dana kada ćete se svi Allahu vratiti, kada će se svakome ono što je zaslužio isplatiti – nikome krivo neće učinjeno biti" (El-Bekara, 281).

Poštovani vjernici, korištenje blagodati u postizanju Allahovog zadovoljstva, osnaživanje njima u pokornosti Njemu, njihovo usmjeravanje u pravom smjeru i korištenje u svakom dobru, ovosvjetskom i onosvjetskom, dokaz je čovjekove sreće/upućenosti, slijeđenja puta razumom obdarenih i bogobožasnih koji spominjanje Njega i zahvalnost Njemu koriste kao put da Mu se približe, a što je On naredio rekavši: "Sjećajte se vi Mene, i Ja ću se vas sjetiti, i zahvaljujte Mi, i na blagodatima Mojim nemojte neblagodarni biti!" (El-Bekara, 152). A to je ona zahvalnost kojom čovjek postiže "povećanje" koje je Allah obećao Svojim zahvalnim robovima u ajetu: "... i kad je Gospodar vaš objavio: 'Ako budete zahvalni, Ja ću vam, zacijelo, još više dati; budete li nezahvalni, kazna Moja doista će stroga biti'" (Ibrahim, 7). Obilne kiše kojima smo ovih dana svjedočili, i koje su trajale danima, poklon su od našeg Gospodara, Plemenitog, Milostivog, Samilosnog, Njegovo dobro





prema robovima koje oni nisu zaslužili i velikodušno dobročinstvo. Ali, bez sumnje najveća blagodat i dobročinstvo, s kojom se ne može porediti nijedna druga, jeste blagodat upute u dini-islam. On je podario neizmjereno dobro Svojim robovima time što im je pojasnio, u objavljenim knjigama, svrhu njihovog stvaranja, kako ne bi lutali u njenom traženju, a ta svrha je obožavanje jedino Njega, Koji nema druga, a o čemu Uzvišeni kaže: "Džine i ljude stvorio sam samo zato da Mi se klanjaju" (Ez-Zarijat, 56). Pojasnio je, također, da je Adema, alejhis-selam, postavio kao Svog namjesnika, halifu, na Zemlji, a poslije njega njegovo potomstvo. Uzvišeni kaže: "A kada Gospodar tvoj reče melekima: 'Ja ću na Zemlji namjesnika postaviti!'" (El-Bekara, 30)

Jedna od najuzvišenijih blagodati jeste blagodat slanja plemenitog Vjerovjesnika, sallallahu alejhi ve sellem, sa uputom i pravom vjerom, da svojom poslanicom izvede ljude iz tmina na svjetlo, uputi ih putevima spasa i oslobodi ih tereta i okova, koji su nametnuti prijašnjim narodima zbog njihovih grijeha i bahatosti, uzdigne ih do najviših stepena dobra i dobrote i udalji ih od svakog zla i prezrenosti, povede ih svim putevima koji će ih dovesti do sreće, ovosvjetske i onosvjetske, i zato je njegovo poslanstvo milost svim stvorenjima i blagodat cijelom čovječanstvu, kao što nas je o tome obavijestio Uzvišeni u najistinitijem govoru: "A tebe smo samo kao milost svjetovima poslali" (El-Enbija, 107).

Njegovo poslanstvo je milost svim ljudima, Arapima i nearapima, bijelima i crnima, muškarcima i ženama, ljudima i džinima. Allahove blagodati prema Njegovim robovima su blagodat vida, sluha i razuma, koje su posebno naglašene u riječima Uzvišenog: "Allah vas iz trbuha majki vaših izvodi, vi ništa ne znate, i daje vam sluh i vid i razum da biste bili zahvalni" (En-Nahl, 78).

Slavljeni Allah istakao je ove blagodati zbog njihove važnosti i vrijednosti, jer one su ključevi svakog znanja, i uzrok upućenja na Pravi put, i put spoznaje onoga čemu treba težiti i razlikovanja korisnog od štetnog.

Jedna od Allahovih blagodati prema ljudima jeste blagodat bračnog druga, da se uz njega smire i da između njih vladaju sloga, ljubav i samilost, i blagodat potomstva,





sinova, kćeri i unuka, i lijepih stvari kojima ih je opskrbio. Uzvišeni kaže: "Allah za vas stvara žene od vaše vrste, a od žena vaših daje vam sinove i unuke, i ukusna jela vam daje. Pa zašto u laž oni vjeruju, a Allahove blagodati poriču." (En-Nahl, 72)

O vjernici! Jedna od Allahovih blagodati prema robovima jeste blagodat rodne i obilne kiše. Uzvišeni kaže: "O ljudi, klanjajte se Gospodaru svome, Koji je stvorio vas i one prije vas, da biste se kazne sačuvali; Koji vam je Zemlju učinio posteljom, a nebo zdanjem; Koji s neba spušta kišu i čini da s njom rastu plodovi, hrana za vas. Zato ne činite svjesno druge Allahu ravnim!" (El-Bekara, 21–22)

Slavljeni Allah opisao je blagodat kiše kao blagoslov, čistoću i uzrok života. Uzvišeni kaže: "Mi s neba spuštamo vodu kao blagoslov, i činimo da, uz pomoć njenu, niču vrtovi i žito koje se žanje." (Kāf, 9)

"I On šalje vjetrove kao radosnu vijest, kao prethodnicu milosti Svoje; i Mi s neba čistu vodu spuštamo, da njome već mrtav predio oživimo i da mnogu stoku i mnoge ljude koje smo stvorili napojimo. Mi smo im o ovome često govorili da bi razmislili, ali većina ljudi poriče blagodati." (El-Furkan, 48–50)

Allah, džellešanuhu, spušta kišu nakon što ljudi izgube nadu da će se ona spustiti u vrijeme kada im je potrebna. On čini ono što je korisno za Njegova stvorenja na ovom i budućem svijetu, i Njemu, na kraju, pripada hvala na svemu što čini i određuje. "On šalje kišu kad oni izgube svaku nadu i rasprostire blagoslov Svoj; On je zaštitnik pravi i jedini dostojan hvale." (Eš-Šura, 28)

Ibn Kajjim, Allah mu se smilovao, kaže: "Kada razmišljaš o gustim i tamnim oblacima, vidjet ćeš da se oni nakupljaju, ni iz čega, na čistom i vedrom nebu, i da ih Allah stvara kada hoće i kako hoće. Pored njihove blagosti i mekoće, oni nose ogromne količine vode, između nebesa i zemlje, dok im njihov Gospodar i Stvoritelj ne dozvoli da spuste vodu (kišu) koju nose, i oni je spuštaju u kapima, svaku kap, u određenoj mjeri, u skladu s Njegovom mudrošću i milošću. Oblaci, tako, izlijevaju vodu na Zemlju, šalju joj je u razdvojenim kapima, nijedna kap se ne miješa s drugom i jedna drugu ne pretiče. Svaka kap spušta se putem koji je određen za nju, ne skreće





s njega, sve dok se ne spusti na zemlju. Kap po kap. Za svaku kap određen je dio zemlje na koji će se spustiti, i ne može preći to mjesto. Razmisli o tome kako njome Allah opskrbljuje ljude, životinje, ptice i pčele, kako opskrbljuje tu i tu životinju, na toj i toj zemlji, u podnožju tog i tog brda, pa im dođe usljed velike potrebe za njom, u tom i tom vremenu.”

Poštovani vjernici! Poslanik pravog puta, sallallahu alejhi ve sellem, ustrajao je na putu zahvalnosti Allahu, džellešanuhu, na Njegovim blagodatima, kojim su išli raniji poslanici i vjerovjesnici, zahvalnosti koju je pretočio u konkretna djela.

Allah, džellešanuhu, učinio je zahvalnost uzrokom povećanja Njegovog dobra i čuvarom Njegovih blagodati.

Potpunosti Allahove blagodati i veličine Njegove nagrade, plemenitosti, darežljivosti i dobročinstva ogleda se i u ukazivanju ljubavi onima koji su zahvalni, Njegovo zadovoljstvo njima i pohvala onima koji Mu zahvaljuju, iako se korist te zahvalnosti vraća samom čovjeku, a ne Allahu. To je vrhunac plemenitosti, poslije koje nema plemenitosti: prvo ti dadne blagodat, zatim te nadahne da zahvaljuješ na njoj, zatim bude zadovoljan tobom, zatim tebi vrati korist zahvalnosti i učini to uzrokom trajanja te blagodati i njene povezanosti s tobom i poveća ti blagodat. Samo ovaj aspekt dovoljan je pametnom čovjeku da razumije sve ostalo. “Ko je zahvalan, čini to u svoju korist, a ko je nezahvalan – pa, Allah je, zaista, neovisan i hvale dostojan.” (Lukman, 12)

Bojte se Allaha i budite Mu zahvalni na blagodatima i dobrima kojima vas je obdario, i na kiši i blagoslovima kojima vas je opskrbio, a koji će uljepšati i popraviti vaše živote, a vaš Gospodar će vam dati i više. Uzvišeni kaže: “Allah je stvoritelj nebesa i Zemlje; On spušta s neba kišu i čini da pomoću nje rađaju plodovi kojima se hranite; i daje vam da se koristite lađama koje plove morem voljom Njegovom, i daje vam da se rijekama koristite; i daje vam da se koristite Suncem i Mjesecom, koji se stalno kreću, i daje vam da se koristite noći i danom; i daje vam svega onoga što od Njega išćete, i ako biste Allahove blagodati brojali, ne biste ih nabrojali – čovjek je, uistinu, nepravedan i nezahvalan.” (Ibrahim, 32–34)





Najbolje čega se može držati onaj koji je iskren u vjeri i koji želi postići Allahovu ljubav i zadovoljstvo, jeste uputa Allahovog Poslanika, sallallahu alejhi ve sellem, u svim aspektima života, to je najpotpunija uputa i najbolja opskrba za Dan povratka. Uzvišeni kaže: "Vi u Allahovom Poslaniku imate divan uzor za onoga koji se nada Allahovoj milosti i nagradi na onome svijetu, i koji često Allaha spominje." (El-Ahzab, 21)

Kada bi Poslanik vidio kišu, rekao bi: "Allahumme sajjiben nafia! – Allahu moj, učini je obilnom i korisnom!" (Buhari)

Poslanik, sallallahu alejhi ve sellem, govorio je: "Allahovom dobrotom i milošću opskrbljeni smo kišom." (Buhari)

Poslanik, sallallahu alejhi ve sellem, podizao je svoju odjeću kako bi kiša natopila njegovo tijelo. Enes, radijallahu anhu, koji je prenosilac ovog hadisa, navodi da su ga pitali: "Allahov Poslaniče, zašto si to uradio?", a on je odgovorio: "Zato što ona tek dolazi od svoga Gospodara." Podsticao je ljude da u vrijeme spuštanja kiše čine dovu i budu ponizni i skrušeni, jer je to jedan od trenutaka u kojima se prima dova. Poslanik, sallallahu alejhi ve sellem, rekao je: "Tražite uslišenje dove kada se susretnu dvije vojske, prilikom ikameta i spuštanja kiše." (Bejheki, Ma'rifetus-suneni vel-asar)

Kada su ashabi tražili od njega da zamoli Allaha da prestane kiša i da se razidu oblaci, nakon kiše, on je učio: "Allahumme havalejna ve la alejna! Allahumme alel-akami vez-zirabi ve butunil-evdijeti ve menabitš-šedžeri! – Allahu, izvan našeg okruženja spusti ove kiše, a ne na nas! O Allahu, na humusno zemljište i na kršovite stijene, u utrobe dolina i korijenje drveća (isprazni kišne oblake)!" Bojte se Allaha, o ljudi, i držite se ove vjerovjesničke upute prilikom spuštanja i trajanja kiše, otvorit će vam se vrata nebeskih blagoslova i postići ćete veliku i plemenitu nagradu.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Allaha Uzvišenog tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

